



大清穆宗繼天開運受中居正保大定功聖智誠孝信敏恭寬
毅皇帝實錄卷之二百六十九

同治八年己巳十月甲寅諭內閣前因劉嶽昭奏參四川總
督吳棠荒謬貪汙物議沸騰各款當經諭令李鴻章馳往四
川確查具奏茲據李鴻章查明覆奏吳棠家眷抵川親丁僕
從僅五十餘人並無用夫三千餘名四轎一百餘頂及需索
門包之事該督到任時司道及各屬員等均未致送規禮亦
無飭造木桶裝銀情事補署各缺均按班次由兩司會詳毫
無情弊其裁減胡中和湘勇令張祖雲另募川勇係為節省
餉需起見川省應解劉嶽昭劉嶽曙餉銀陸續籌撥並未停

解。至另解岑毓英餉銀。本係應協滇餉。並非移此就彼。岑毓英亦無差官餽遺之事。並訪聞川省官場習氣。頗尚鑽營。吳崇履任後。遇事整頓。以致貪官猾吏。造言騰謗等語。吳崇被參各款。既據李鴻章查明均無其事。即著無庸置議。川省吏治防務。均關緊要。吳崇務當振刷精神。力籌整頓。毋稍瞻顧貽誤。劉嶽昭於所參吳崇各節。並未詳查虛實。輒以傳聞無據之詞。率行入奏。實屬不合。著傳旨嚴行申飭。該督現已馳抵雲南省城。著將應辦各事。與岑毓英和衷商榷。不得稍涉偏私。致干咎戾。○又諭。前因御史張沄奏。四川道員鍾峻彭汝琮貪詐鑽營。又據御史龔承鈞奏。彭汝琮任意招搖各節。

先後諭令李鴻章查明參辦。茲據奏稱。鍾峻被參各款。查無行賄實據。惟該員妄改場規。包攬釐局。已有明徵。彭汝琮貪利各情。雖不承招。而鑽營實有其事。且丁憂後奉旨飭令回籍。仍敢逗遛營求。為崇實吳崇公請幕友。請分別參辦等語。四川成綿龍茂道鍾峻。著即勒令休致。永不敘用。鹽運使銜四川候補道彭汝琮。著即行革職。勒令回籍。不准投效各路軍營。再圖開復。崇實吳崇。於奉旨飭令回籍之員。仍復留充幕友。均有不合。著交部照例分別議處。尋吏部議。崇實吳崇均照上司濫邀屬員充當幕友。進署辦事私罪例。革職。得旨。均著加恩改為革職留任。○又諭。丁日昌奏。訪查營弁勇丁

人等滋事釀命。請分別革職審辦一摺。丁日昌無服族人都司丁炳。因銷差回籍。經過蘇州。輒因丁日昌出省查勘水災。帶同家丁閒遊妓館。與水師勇丁爭鬧。遊擊薛蔭樛帶兵巡夜查拏滋事人等。棍責勇丁殞命。請將薛蔭樛、丁炳先行斥革。並自請議處等語。都司丁炳在妓館爭鬧。遊擊薛蔭樛責打勇丁。以致釀命。均屬藐法妄為。薛蔭樛、丁炳均著先行革職。交馬新貽親提全案人證。嚴行審訊。按律懲辦。丁日昌雖事前公出。事後訪聞。究屬疏於防範。並著交部議處。尋議。丁日昌應照防範不嚴例降一級留任。得旨准其抵銷。○諭軍機大臣等。劉嶽昭、岑毓英奏官軍攻克楚雄等城。劉嶽昭奏

移師進省。會籌全局各一摺。滇軍連克楚雄南安定遠三城。已有破竹之勢。惟土堆祿豐之賊負隅未下。該二處賊黨無多。著劉嶽昭、岑毓英督飭各軍乘此聲威。迅圖攻拔。其省南之昆陽新興館驛溇兮及東南之澂江竹園等處踞匪。並著分飭官軍力圖進取。次第廓清。以便騰出兵力。直擣迤西老巢。綏靖邊圉。劉嶽昭現在既抵省城。即著與岑毓英會籌調度。該督撫均膺重寄。務當和衷商榷。共維大局。不得稍存私見。致負委任。昭魯一帶漢回構釁。現在曾否解釋。並著妥為籌辦。毋致滋生事端。將此由五百里各諭令知之。○又諭。李鴻章奏遵查川黔民教各案大概情形。並派員赴黔會查一

摺。酉陽民教互殺案內首犯劉幅。雖有初供可據。仍著李鴻章會同崇實、吳棠將該犯嚴切覆訊。並提集餘犯。研究明確。張佩超是否正犯。亦當懍遵前旨。趕緊查明。按律懲辦。遵義教士被傷殞命一案。李鴻章現派道員余思樞馳往查訪。並著曾璧光飭令黔省委員會同余思樞督飭官紳妥速籌辦。毋稍稽延。現在法國使臣羅淑魯業帶兵船起身前赴四川等處。雖不至遽啟釁端。第川黔教案不能迅速完結。必至枝節橫生。愈難措手。李鴻章等務當持平妥辦。剋期結案。不得再有遲誤。其宣維禮案。即著李鴻章咨明曾璧光查明參辦。將此由六百里各諭令知之。○予雲南澂江陣亡都司馬

廣祭葬世職加等。○予雲南楚雄等處陣亡傷亡守備張星等十八員祭葬世職加等。○追予江蘇各屬殉難州同汪棠等紳民婦女一千七百十四員名口分別旌卹如例。○追予湖北江夏殉難知縣王恩綬建立專祠。子燮附祀。○乙卯諭軍機大臣等。富明阿奏派兵堵剿竄匪一摺。據稱吉林甯古塔屬薩奇庫卡倫額穆赫索羅通溝及省西北下二臺等處。突有賊匪竄擾。業經分派官兵捕剿。並於各要隘一體堵擊。即著富明阿、毓福嚴飭派出將弁督率官兵認真搜捕。務將額穆赫索羅通溝等處賊匪悉數殲除。不准一名漏網。將此各諭令知之。○又諭前據袁保恆奏各省協餉不敷應用。請

實錄卷一百九
四
提款撥補。並仍由左宗棠統收分撥。請撥雷正綰一軍專餉。各摺片。當交戶部議奏。茲據戶部奏稱。各省新舊協撥西餉。果能源源報解。自足敷用。且各省財力。止有此數。袁保恆所請。提撥江西安徽江蘇九江關等處餉銀。均屬窒礙難行。請飭各省將欠解協餉如數籌撥等語。陝甘軍務緊要。各省奉撥西征月餉。欠解甚多。何以收飽騰之效。著戶部行知各該督撫監督等。懍遵疊次諭旨。將短解月餉竭力籌措。補解足數。以維大局。儻再仍前延欠。即著左宗棠指名參奏。其解到協餉。仍著左宗棠袁保恆遵照前旨。統收分撥。籌濟陝甘各軍。毋稍偏枯。至雷正綰一軍應需餉項。原撥河東等處銀兩。

既不敷用。即著照戶部所議。由閩海關六成洋稅項下每月撥銀二萬兩。為該軍專餉。著文煜英桂卞寶第隨時派員解赴陝西糧臺。毋稍延緩。此外陝甘兩省。無論何營餉項。均著左宗棠於奉撥協款內酌量勻給。概不得另請專餉。以免紛歧。原摺著鈔給袁保恆閱看。將此由五百里諭知左宗棠。文煜英桂卞寶第。並傳諭袁保恆知之。○賞通州王恕園等處。度賑粟米六百石。○丙辰。涼州副都統瑞雲奏。請將記名提督王仁和留於涼州幫同防勦。得旨。著咨商左宗棠妥籌辦理。甘省各屬軍務。均關緊要。毋致顧此失彼。○補鑄廣東水師提標左營遊擊關防。從兩廣總督瑞麟請也。○以查報水

災不實。吉林雙城堡總管那斯洪阿等下部議處。○丁巳諭內閣。軍機大臣吏部尚書文祥病逾月。尚未就痊。實深廩繫。著派御醫王繼武前往診視。並賞給人參八兩。以資調理。○諭軍機大臣等。金順奏官軍會勦疊勝。蹋毀賊壘一摺。納家牯踞逆。見渠泮上修築礮臺。糾眾直撲工所。王家疇莊亦出賊來襲。經金順等會派楊春祥各軍擊敗。追至納家牯濠邊。王連三常福等亦將王家疇莊之賊擊退。逆首納萬沅王三春。勾合陝回於楊和堡修築壘卡。楊春祥等分投壓勦。斃賊甚多。該處新築四壘。均經官軍蹋毀。其分擾渠西及衛隊營。迤東各賊。復經何維愷等追殺。直抵納家牯東門。現賊眾

均集於納王兩莊。金順等擬進紮楊和堡一帶。以圖進取。著即會同張曜督飭各隊。將渠泮礮臺趕緊築成。一面抽撥東面各營。乘勝合圍。以收聚殲之效。毋任該逆負隅拒守。阻截官軍。前據左宗棠奏甯靈已無陝回蹤跡。茲金順奏西岸南路陝匪。廣集納王兩莊。甯夏一帶陝回情形。究竟若何。劉松山軍現抵何處。相距計不甚遠。何以未見會合。靈州是否失守。著金順查明詳細奏聞。並將甯靈等處甘回向背情形。據實具奏。將此由六百里諭令知之。○予甘肅納家牯陣亡參將何維愷祭葬。世職加等。○戊午。諭軍機大臣等。定安奏撥勦蒙境竄匪殆盡。擬請添調隊伍。並調總兵張得祿統帶各

摺片。宋慶一軍進勦鹽海子等處回匪。疊獲勝仗。擒斬殆盡。勦辦尚屬得手。所有在事出力員弁。著由定安擇尤彙案保奏。候旨施恩。仍著該將軍督飭宋慶等各帶所部認真探勦。並令沿河各軍嚴加防範。毋稍疏虞。現在張曜等進軍甯夏。其邊外後路。雖已布置嚴密。而河西一帶尚屬空虛。定安請調勁旅以厚兵力。自應俯如所請。著神機營王大臣派撥兩翼前鋒八旗護軍營頭二起馬隊一千名。並派得力大員統帶前赴綏城。其劉景芳舊部馬勇五百名。即著崇厚檄令該提督統帶赴綏。以資熟手。一俟到防。統由定安酌量分撥。以為張曜後路接應。至此項兵勇應需餉乾。即著神機營崇厚

按月籌款給發。毋令缺乏。其前經到防之天津洋槍礮隊餉需。仍著崇厚照舊發給。定安奏前後調到之吉林黑龍江馬隊餉乾。請飭神機營一併統籌接濟之處。著該王大臣斟酌辦理。定安原摺著鈔給閱看。張得祿遠在奉天。飭調需時。應派劉景芳管帶馬勇。以免周折。將此諭知神機營。並由五百里諭令定安。崇厚知之。○又諭。前因川黔教案未結。法國使臣欲帶兵船入川。當經諭令李鴻章趕緊查明審結。茲據總理各國事務衙門奏。羅淑亞行抵天津。聞知安慶復有拆毀天主教堂耶穌書院之案。即行登舟赴滬等語。該使此次出京。稱欲帶兵赴川。實因川黔教案日久未結。故為此脅制之

計若不迅速辦結。必至激成事端。辦理愈形棘手。酉陽一案。該使以張佩超為主謀。楊珍廷為下手。劉幅為頂兇。必須切實根究。著李鴻章、崇實、吳棠、溥遵疊次諭旨。趕緊查明擬結。遵義一案。李鴻章已派余思樞前往查訪。並著速為結案。毋稍遷延。李鴻章前奏擬往重慶就近體察各情。如事機稍鬆。即行回鄂等語。朝廷以此事關繫緊要。故特令該督會同查辦。李鴻章行抵重慶後。必須將川黔兩案如何辦結奏明。候有諭旨再行回鄂。安慶拆毀英法教堂。究竟因何啟釁。此次法國使臣帶領兵船沿江上駛。必由安慶經過。尤恐藉此要挾枝節叢生。著馬新貽、英翰速將此案設法了結。不可稍有

延緩。原摺單均著鈔給閱看。將此由六百里各諭令知之。○以辦理海運漕糧出力。予江蘇知州杜文溥等加銜升敘有差。○己未諭軍機大臣等。張之萬奏請飭各省撥解協餉。興修隄工一摺。堰圩長隄為淮陽保障。軍興以來。失修年久。潰塌日增。亟須次第修復。據該督奏稱。各省額解河銀尚多懸欠。一時無款興辦。現清淮防務已鬆。請飭浙江等省將歲協清淮軍餉按年撥解。為舉辦隄工之用。約四五年後隄工完固。再行停止。並請飭催欠解河銀等語。著李鴻章、李瀚章、劉坤一、郭柏蔭、劉峴將浙江、江西、湖北、湖南歲協清淮餉銀各二萬兩。自同治九年為始。照舊按年撥解。張之萬即將應修

各工以次興辦。浙江積欠清淮協餉尚多。亦著如數補解。至山東浙江廣東欠解河銀。並著瑞麟、丁寶楨、李瀚章、李福壽迅速撥解。以濟要需。將此各諭令知之。○漕運總督張之萬奏報霜汛安瀾。命詣

河神廟祀謝。○以哈密攻克柳樹泉賊壘。賞都司張炳守備張士魁、千總李琦、李生元、劉珍、巴圖魯名號。守備王俊義等花翎。知縣雷起瀛等藍翎。餘加銜升敘有差。○庚申諭軍機大臣等。福濟等奏密陳管見。暨請飭錫綸催令圖瓦強阿趕回署篆。並請區別巴哈等城餉銀各摺片。布倫托海游民業經反正。若不妥為安插。必至日久流離。福濟等以哈密勇目

孔才與降眾多有親故。已玉商文麟等轉為勸諭。卽著文麟、景廉諭知孔才。迅派妥人招集。將該降眾帶赴哈密軍營。既可遂其報效之忱。又得親朋完聚。藉息爭端。該大臣等務當善言開導。毋令失所。錫綸因游民新撫。欲令圖瓦強阿帶兵鎮守。此等降眾。毋庸紮隊防閑。致滋疑慮。况索倫一營甫回本境。管帶乏人。著錫綸仍照該將軍等前議。催令圖瓦強阿統帶原來官兵。趕回署篆。以重邊防。不准藉詞延緩。科布多布倫托海兩城。本有定餉。現在哈密巴里坤軍務未平。餉需何可缺乏。嗣後各路餉項到烏城時。福濟等自應先顧巴哈。以資防勦。其科海兩城。不得藉口借撥。著該將軍等卽行分

咨各該城大臣遵照辦理。福濟文碩原摺一件。著留覽。將此由五百里各諭令知之。○又諭福濟等奏請飭山西巡撫將烏科二城歲需經費。並欠解新疆軍餉。迅速籌解一摺。烏科二城每年額餉銀八萬五千兩。近來晉省歲撥僅六萬餘兩。積欠甚多。部撥新疆餉銀。由烏臺分撥各城。止能暫顧目前。瞬屆隆冬。各軍飢寒交迫。亟應豫籌接濟。福濟等所奏。自是實情。著李宗羲督飭藩司。查照應解烏科二城歲需經費八萬五千兩。並欠解新疆軍餉。趕緊如數籌備。源源解往。毋誤要需。將此由五百里諭令知之。○盛京將軍都興阿奏。游匪竄擾孤山。現經撲滅。得旨。著仍嚴飭控拏逸犯。毋任逃脫。肅

清邊界。○賞降調頭等侍衛圖庫爾藍翎侍衛。為伊犁領隊大臣。○以奉天緝捕出力。予蒙古協理台吉薩金凌保議敘。賞二品協理台吉那孫巴圖頭品頂帶。四品台吉兵噶爾瑪波爾賚等花翎。○予故伊犁領隊大臣霍伽布祭葬卹廕。如軍營病故例。○辛酉。以神靈顯應。頒陝西長武縣城隍廟扁額曰靈昭宜祿。○諭內閣。御史賈瑚奏。請將道員長賡處分。飭部另議。劉嶽昭傳旨申飭。不足以昭炯戒。一摺。所奏不為無見。惟山東兗沂曹濟道長賡。前以濫刑斃命。降旨革職留任。因丁寶楨附片聲明。該道員係為整頓地方起見。且在蘭山縣沂州府任內。均能賊畏民懷。為東省必不可

少之員。是以僅予革職留任。以示薄懲。非謂嚴酷之員。概可稍從未減也。總督劉嶽昭。據傳聞失實之辭。率行彈劾。大員原應治以應得之罪。因李鴻章密陳時事多艱。朝廷用人不能不節取其長。且劉嶽昭前在各路軍營。尚有微勞。現當雲南軍務需人。正資勦辦。該督前經革職留任。僅予嚴行申飭。以儆將來。該御史於朝廷曲成人才之意。尚未深悉。所奏著無庸置議。惟長賡職任監司。有撫綏地方之責。若仍以嚴酷為能。必至濫及無辜。著丁寶楨留心察看。如再有任性妄為之處。即行據實嚴參懲辦。不得稍有徇隱。至劉嶽昭以總督大員。辦理軍務。儻敢如前輕率任意。不能使地方日有起色。

必當重治其罪。毋謂寬典可再邀也。○以失察勇丁滋事。陝西軍營總兵官劉厚基下部議處。○壬戌。諭軍機大臣等。前因劉嶽昭奏。唐友耕所部滇練。與昭魯回民尋仇生釁。當諭崇實等飭令該提督趕緊前進。不准逗遛。茲據崇實。吳棠奏。魯甸回匪李本忠。糾黨數千。燒殺村寨。抗拒官軍。叛跡昭著。旋經唐友耕會同該處文武。勦撫兼施。解餉後路。現已肅清。威甯等處回寨。均各求撫。唐友耕一軍。應否留滇。請飭劉嶽昭等商辦等語。李本忠原係杜汶秀黨與。此次糾眾復叛。自難姑容。現經官軍殲斃賊黨千餘名。逆膽已寒。即當乘此聲威。速籌戡定。劉嶽昭所派孔昭鈞等。曾否行抵昭通。辦理情

形若何。刻下雲南省圍已解。唐友耕一軍。應否暫留。昭通會同辦理。或仍令赴省。著劉嶽昭、岑毓英、妥商調度。如滇省兵力已敷。即著咨商崇實等將該軍遣撤回川。扼守邊境。崇實等原摺。著鈔給劉嶽昭、岑毓英閱看。將此由五百里各諭令知之。○又諭。錫綸、棍噶扎勒參奏。遵保出力弁兵。開單請獎。請賞喇嘛銀兩。並籌給新撫民人口食。整頓臺站。及索倫官兵。請賞銀兩。縷陳土爾扈特流徙情形。暨創修千佛廟宇。請賜廟名扁額。棍噶扎勒參奏。因病請假。各摺片。棍噶扎勒參隨征弁兵。在事出力。自應量予獎勵。惟此次單內開列各員。有無冒濫。著福濟、錫綸會同詳細查數。奏明候旨。其隨同錫

綸辦事弁兵。亦著歸入此案酌保數員。毋許浮冒。至所請賞銀一千兩。分給喇嘛愛拜等一節。並著該將軍等查數具奏。原摺片單三件。即發交福濟查明辦理。變民初經撫定。錫綸等現已籌買糧石等項。陸續解往。藉資口食。而臺站廢弛。轉運維艱。亟宜設法整頓。著奎昌、明瑤於所屬各臺站。或廣籌錢糧。或添設駝馬。務令一律整飭。不得仍前疲弛。致誤大局。至該民人等安插事宜。仍著文碩、錫綸等妥議章程。奏明辦理。現屆冬令。塞外風雪嚴寒。所有在防之索倫官兵及綠營兵丁。著照所請。每人賞銀十兩。以示矜恤。棍噶扎勒參歷年帶兵勦賊。著有勞績。此次因病請假。自應俯如所請。著賞假

一箇月調理假滿後即赴阿勒台山。收集徒眾。妥辦安插各事。以遂其皈依懺悔之忱。其創修千佛廟宇。著俟工竣。由福濟。文碩。錫綸等陳奏。再行賜名。並頒發扁額。至所鑄千佛請用軍臺駝載之處。殊於定制不合。著不准行。土爾扈特人眾北徙。屯駐布倫托海地方。業由錫綸等暫給口食。以濟目前。著福濟等相機妥辦。遣回本牧。該蒙古向來崇信佛法。並傳知棍噶扎勒參協同勸阻。毋失機宜。將此由六百里各諭令知之。○癸亥。諭內閣。明善于凌辰奏。請將寶源局已革鑪頭歸案審究。並將監督大使議處一摺。寶源局大使成蔭。於鑪頭孫鳳起私淘銅土。漫無覺察。已屬不合。且於應管事宜。前

後語涉歧異。其庫存銅斤。經明善等清查。始據監督長潤聲稱。內有已革鑪頭王煒均。另存商銅一萬餘斤。屢傳未領等語。殊難憑信。王煒均著刑部傳審嚴究。監督長潤。陳大誥。大。使成蔭。均著交部分別議處。○諭軍機大臣等。榮頤等奏。慕陵樹株年久未能茂密。謹擬加種換補。請派親郡王查勘議奏。再行欽遵辦理等語。

慕陵

慕東陵各山樹株年久未能茂密。

慕陵五孔橋前松樹亦多萎弱。自應查照從前成案。酌量加添換補。以期一律鬱蔥。該大臣等守護

陵寢責有專司。况有成案可援。尤當遵照籌辦。何得率請欽派親郡王查勘。意存諉卸。殊屬非是。著卽敬謹查看。將如何按空添樹換土補種。俾根深葉茂。可期經久之處。詳慎妥籌。迅速奏明辦理。將此各諭令知之。○又諭。戶部奏統籌雲貴協餉。請旨分別辦理一摺。雲南貴州兩省軍務未平。亟需各省協餉。源源接濟。茲據該部奏稱。雲南協餉。前經議准。四川每月撥銀三萬兩。湖北每月撥銀二萬兩。湖南每月撥銀二萬兩。江西每月撥銀二萬兩。浙江每月撥銀三萬一千六百六十六兩零。現在該省軍務緊急。各省協餉報解不齊。時形拮据。自應迅速籌濟。著吳棠。李鴻章。馬新貽。劉崐。郭柏蔭。劉坤

○李瀚章。遵照該部前次奏案。在各該省釐金捐輸及無論何款內。迅速湊撥。按月提交雲南委員陸續領解。不得稍有遲誤。其各該省是否按月解清。並著劉嶽昭。岑毓英。詳細開單報部。以憑查覈。至貴州協餉。前經該部酌定。每月四川撥銀五萬兩。湖南撥銀二萬兩。湖北撥銀二萬兩。廣東撥銀一萬兩。又曾國藩等奏請免撥黔餉。經該部奏准。仍遵前奏。每月協銀一二萬兩。或數千兩。現在各該省所撥月餉。能否按月解齊。未據曾壁光奏咨到部。該省現存兵勇若干。每月餉銀並雜支等項。共需銀若干。其本省地丁釐金捐輸等銀。每年可收若干。除本省所收銀兩外。尚需協撥銀若干兩。著曾

壁光按照戶部指詢各節。開單迅速奏報。並著吳崇、馬新貽、李鴻章、瑞麟、丁日昌、郭柏蔭、劉焜、李福泰各將應協黔餉。按月如數撥解。不得稍有帶欠。將此由五百里各諭令知之。○又諭。豐紳謙禧奏甯夏籌防情形。靈州失守各摺片。甯夏府城解嚴。業經金順馳奏。現在賊匪聚於納王兩莊。著金順懍遵前旨。會同張曜迅籌圍剿。毋任久踞。甯夏城防。豐紳謙禧仍當備豫不虞。毋稍疏懈。靈州失守。總未據左宗棠奏報。茲豐紳等奏。接劉松山咨稱。副將謝榮華等在靈州經理糧臺。該處回民。聞各寨堡與官兵接仗。遂將城門關閉。殺戮漢民。謝榮華等不知下落等語。是靈州回民叛亂。已無疑義。惟劉

松山軍糧臺。安設靈州城內。有無激變。該回民有無搶劫糧臺情事。並以後情形若何。仍著金順詳細查明。據實奏聞。將此由四百里諭知金順。豐紳並傳諭謙禧知之。○甲子。諭內閣。都興阿等奏。拏獲聚眾滋擾賊匪正法。請將帶兵各員分別勸懲一摺。盛京鳳凰城屬北井子地方。突有賊匪聚集多人。訛詐鋪戶。並將岫巖廳通判截留。意圖占踞孤山。糾眾擾害。經統領叢登甲等帶兵往捕。將賊犯王慶等二十四名拏獲正法。至啟釁要犯叢均茂、叢漳等。現尚在逃。著都興阿等嚴飭帶兵各員。務將該犯等設法訪拏。嚴行懲辦。此次在事出力員弁兵役。准由該將軍等擇尤酌保。毋許冒濫。防禦倭

什楞額。驍騎校文保。經鳳凰城守尉奕艾派往勦賊。竟敢託
故遲延。實屬疲玩。倭什楞額。文保。均著革職。交該城守尉差
遣。以觀後效。奕艾於所派兵丁。參差不齊。亦難辭咎。著交部
察議。○又諭。前據奕榕奏。請將已革佐領春鐸暫行留營差
遣。旋保開復原官。當經兵部議以該革員甫准暫留。不得藉
詞開復。並聲明應否留營之處。令都興阿據實覆奏。茲據該
將軍奏稱。春鐸年力富強。緝賊甚為得力。請准留營。並查明
已革協領毓昌當差勤奮。防勒尚合機宜。請一併留營等語。
春鐸。毓昌。均著准其留營差遣。以觀後效。○諭軍機大臣等
前因都興阿等奏。勘辦展邊事宜。當經諭令該部查照向章。

行知朝鮮國王。慎守邊境。如有游民私越滋擾情事。即行照
例懲辦。茲禮部奏。據該國王咨稱。以近來游民恣意蔓延。罔
有顧忌。非伊國力能擒捕。因畏道路梗塞。請使江外之地。柵
路去處。嚴奉諭旨。無敢更肆違越等語。奉天。畿。江。西。岸。與朝
鮮。僅一江之隔。該處地狹人稠。既嚴禁准墾。民人。不准過江
一步。如有越界滋事者。准由該國查拏。解交附近邊門懲辦。
該游民等。自必知所做畏。不敢肆越滋擾。惟內地奸民。愈聚
愈眾。難保不於江外之地。仍行偷越。該國王慮及道梗。欲於
柵路去處。遵奉嚴禁。自係實情。著都興阿等。懍遵前旨。於沿
江一帶。嚴飭各該地方員弁。實力稽查。儻有中國民人。私行

開墾。或於沿邊肆擾不法者。卽行嚴拏懲辦。不得任其屯聚。以重邊防。將此由五百里各諭令知之。○人諭。左宗棠奏。劉松山一軍。續獲勝仗。暨各軍勦回獲勝。並覆陳靈州。現在情形。郭寶昌無庸折回山西。各摺片。陝回經官軍擊敗後。竄踞顧家寨等處。劉松山督軍進勦。馬化澂屢以求撫為辭。而賊中修寨掘濠。並未少息。該軍自八月二十九日至九月十九日。疊破顧家寨馬家寨各處賊壘。並斬賊目毛遂生等多名。現在陝回已去。金積堡賊勢甚孤。惟馬化澂陰蓄詭謀。每以乞撫為緩師之計。若不痛加勦擊。為患更深。劉松山所調花定後路四營。計已早到。著卽飭令該提督乘此聲威。合隊追

勦。毋任該逆從中勾結。日肆蔓延。如有真心悔罪。赴營求撫者。亦著該提督相機辦理。黃鼎、雷正綰等軍。在新堡子等處各獲勝仗。殺賊甚多。賊由狄道向河州竄去。現在赴省驛道已通。著該大臣卽飭黃鼎等分投扼紮。遏賊回竄之路。其蘭垣防勦事宜。並著妥籌兼顧。回人李百寬等。該大臣仍當檄令曾傳理分別妥為安撫。靈州降回變亂。現已收復。查非劉松山濫殺所致。著毋庸議。副將謝榮華等下落。並著查明辦理。刻下黃河冰結。山西河防更為緊要。該大臣既以李慶翱為不足恃。則郭寶昌赴晉之行。尤不可緩。著卽檄飭該提督酌帶親兵。迅赴山西。金運昌已督軍抵甯條梁。並著飭令迅

速前進。與劉松山軍會。埽賊氛。毋稍濡滯。將此由六百里諭令知之。○又諭前因左宗棠奏署山西臬司李慶翱部詐成性。惟解鑽營。當經諭令鄭敦謹查奏。旋據該署撫奏稱。李慶翱於公事頗能講求。實無夸詐習氣。因即降旨宣示。無庸置議。茲據左宗棠奏稱。山西冬防。實須早為準備。李慶翱斷非勝任之人。前此劾奏李慶翱。均有實據。山西河防。若恃李慶翱必至貽誤等語。山西沿河冬防喫緊。李慶翱能否勝任。著李宗義留心察看。確切查明。據實覆奏。毋得稍有遷就。致滋貽誤。將此諭令知之。尋奏。遵查李慶翱布置河防。井井有條。現值冬防喫緊之時。未便遽易生手。報聞。○予甘肅顧家寨

等處陣亡副將李洪吉等十七員祭葬。世職加等。○乙丑。諭軍機大臣等。金順奏。官軍進攻賊巢。現已合圍一摺。甯夏解嚴後。逆匪踞納王兩莊。伏匿不出。惟於寨外添築卡壘。負隅抗拒。經金順會同張曜督兵進攻。獲勝。毀平賊卡三座。分隊追趕。直抵寨門。該逆猶敢憑牆死守。並出馬隊抄襲我軍。復經該署將軍等痛加勦擊。會兵合圍。勦辦尚屬得手。著該署將軍會同張曜。激勵各軍。乘此聲威。務將賊巢剋期攻拔。毋稍遲延。其杜家寨等處。屯聚陝土各匪。甚眾。亟應勦除。以孤賊勢。並著督飭將弁分路進勦。毋任勾結為患。將此由五百里諭令知之。○又諭劉崐奏。援黔官軍擊苗疊勝。克復勝東

城池一摺。貴州苗逆九大白等在勝秉城屯聚。提督龔繼昌督隊進攻。賊復死拒。總兵蘇元春分路抄擊。燒毀城外之巫信貴籠涼風坳各逆屯。當將勝秉城池收復。龔繼昌又擊敗施洞口等處來援之賊。其平苗三寨。經蘇元章塌平。包大肚等合股來追。官軍將其擊退。清水河邊山上賊屯。亦經龔繼昌攻破。焚燒賊穀甚多。彭芝亮等復將潛襲施秉縣城及分伏木弄等處各逆。先後截殺。各路賊卡均已次第埽除。勦辦尚屬得手。惟施黃境內。苗巢猶多。必須先平施黃逆巢。肅清江內。方可分路攻取。制賊紛竄。現在席寶田已抵長沙。卽著劉崐飭令該臬司趕緊部署。督軍前行。以期迅抵黔疆。與川

軍會合。痛埽逆氛。其清江寨頭鎮施各路。應行增兵填紮之處。亦著該臬司妥籌布置。毋稍疏漏。另片奏請調總兵赴黔差遣等語。總兵蕭榮芳既據該撫奏稱打仗尚能得力。卽著飭令募勇二千名。前赴貴州攻勦。歸席寶田調遣。以資厚集。將此由五百里諭令知之。○署甯夏將軍金順泰九月二十九日。提督劉松山督軍克復靈州城池。報聞。○命吏部左侍郎胡肇智。刑部右侍郎桑春榮。在紫禁城騎馬。○新授工部右侍郎閻敬銘乞休。以都察院左副都御史童華為工部右侍郎。管錢法堂事。未到任前。仍以通政使司通政使于凌辰署理。實授大理寺卿彭久餘。都察院左副都御史。○以湖南

官軍克復貴州勝秉城。予提督龔繼昌等優敘。復總兵官唐本朋。蘇元春職。並賞還勇號花翎。○以甘肅成縣守城出力。予候選同知李篤慶等獎敘有差。○予甘肅王家疇莊陣亡。記名副都統協領貴陞祭葬世職。如都統例。建專祠。並入祀京師暨原籍昭忠祠。○予甘肅狄道等處陣亡副將范珍等十六員祭葬世職。○丙寅諭軍機大臣等。給事中陳鴻翊奏。直隸西南各屬。本年雨澤稀少。災歉已成。聞有報災未遂。人懷亂萌之說。又廣平屬之清河威縣。毗連山東館陶等縣。磁州成安。毗連河南安陽等縣。大名府則與曹州接壤。捻幅餘匪。難保不潛伏其間。其開州等處。人心亦多浮動。現聞各處

已漸有均糧等事。若飢民相率效尤。各匪乘機竊發。必至貽害地方。請飭曾國藩查明辦理等語。著曾國藩迅即派員查明各該地方被災輕重情形。分別賑濟。如有應蠲應緩之處。並著趕緊奏明辦理。以惠災黎而消隱患。原摺著鈔給閱看。將此諭令知之。○又諭。文麟。景廉奏。請飭迅解軍餉。並滙陳關外瘠苦情形。請撥餉採辦軍糧各一摺。前因哈密需餉孔殷。諭令山西巡撫。於欠餉內先撥銀六萬兩協濟。茲據文麟等奏稱。屢次派員催提。該省總未撥解分釐。現在關外情形萬緊。士卒枵腹荷戈。亟需餉銀接濟。著李宗義嚴飭藩司並河東道。迅速籌撥銀六萬兩。交防禦奎禧等星夜解赴文麟

等軍營。毋再遲誤。其烏里雅蘇台。勻撥哈密餉銀。該城前因部款未到。先籌銀一萬兩。據文麟等稱。尚不敷支發。著福濟榮。舍寬為籌撥銀數萬兩。以濟急需。至關外軍糧。採辦維艱。成祿出關後。兵數日增。需款尤鉅。著戶部查明有著之款。趕緊籌撥。以便該大臣等派員分途採辦。並著左宗棠。穆圖善。懍遵前旨。趕緊籌運接濟。兼派大員專司其事。或飭鎮迪道總理後路糧臺。俾得源源挽運。免致貽誤。將此由六百里各諭令知之。○追予江蘇常州等處殉難武生莊載興等紳民婦女一千四百四名。口分別旌卹如例。○旬到河南。山東。清實罪犯。停決河南斬犯二人。山東斬犯三人。餘六十五人。予

旬。○丁卯。諭軍機大臣等。穆圖善奏。官軍擊勒竄匪獲勝。並留總兵接辦軍務。請飭糧臺撥餉接濟各摺片。甘肅禮縣所屬地方。於本年八月間。被回匪滋擾。經提督喻正祥親督兵勇。節節進剿。殺賊多名。該匪潰敗狂奔。現在崖城等處。已無賊蹤。即著左宗棠。穆圖善。飭令各軍。仍行加意防範。遇賊即擊。毋稍鬆懈。其駐紮中衛之貴字三營。著照該將軍所請。飭令總兵黃金山接統。將前募防城之勇。補足三營額數。並另集圍隊二百名。悉聽金順節制。即著該署將軍妥為調遣。會同張曜聯絡劉松山暨金運昌各軍。將北路回逆悉數掃蕩。貴字營等餉需。無處支領。著左宗棠。飭令西征糧臺。將黃金

山所統三營並圍隊二百名需用餉銀按月撥濟穆圖善著
懍遵前旨將總督關防迅速派員齎交左宗棠接受以專責
成將此由四百里各諭令知之○予甘肅永昌等處陣亡副
將蔣光晉知縣翟步霄等祭葬世職

大清穆宗繼天開運受中居正保大定功聖智誠孝信敏恭寬
毅皇帝實錄卷之二百六十九

